

**Paulo Ena Marere Ibaruana  
KORINTO  
Haukia Herekiai**

*Puka Aona Irerena 'Abina*

Korinto aiaranai ba'ioibi haukia bai'oikia ekia 'abi ki'a obokia Paulo herenai tehina hanona a'ikakauma haukia ekia a'ikakauma tea'i ki'ana. Hoahoa neianai hanona Paulo ena raona raona ia ahakiai hanona eapa'ua ki'a baha. Ena nuatae hanona 'abi 'ao ba'ioibi bai'oina neiana Korinto haukia herekiai kebaberonona, weiana paunai marere neiana ererena, ia kipokia kateonamo haeamo mue.

Puka neiana paipana kori'uaina aonai Paulo ehore 'abi pahihikia tohokia baika ehina pounakia 'abi weiakia Korinto maearimakia ebeni 'uainakia haukia. Paulo enuatae ia hanona ua a'i ke'abi aiho, iamo ekia apa, baro'e ai mai ia teiha 'ama'amana paunai 'abi pahihikia tohokiai ehina benakia. Korinto haukia 'abi neiakia aiana kateo'o ba katebatohanakia mai ekia hoahoai kateraona kabe hanona aonamo kerama.

Rani weianai abomo a'ikakauma haukia Iudeai hanona ekia mauri teki'a. Ua buonai Paulo barairarai monikia baika ebararonakia, keaoainakia kebenakia. Weiana buonai Korinto haukia aokia niba taburanakia, aka neiana paunai moni baika katebaibeni (8—9).

Puka orenai hanona Paulo e'abi, ba'ioibi haukia bai'oikia baika teao tibaki'ana. Ena nuatae apa'uana hanona Korinto haukia ba'ioibi bai'oikia weiakia aiakia a'i kateo'o.

*Puka Paipana Apa'uakia*

- a. Roba iahu. (1.1-11)
- b. Paulo mai Tirama ena marea haukia Korintoai. (1.12—7.16)
- c. Beruberu tabakia a'ikakauma haukia Iudeai 'eukia. (8.1—9.15)
- d. Paulo iuhubeau hauna ena hiabu. (10.1—13.10)
- e. 'Abi orekia. (13.11-14)

### *Banamo 'Abina.*

<sup>1</sup> Au Paulo Keriso Iesu ena iuhubeau hau'u Tirama ena nuatae paunai, mai a'ikakaumai uaho'abaka Timoteo ohi marere neiana tarerena niwahi Tirama ena marea haumi Korinto aiaranai tomiaho abomo Tirama ena maearima ikoimiai Akaia hanona maikoina aonai tomiaho haumi heremiai. <sup>2</sup> Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiai kemiaho.

### *Tirama Hanona Ao Bakiro Ikoinai Pokina.*

<sup>3</sup> Tirama kahabanamona aika eka Obiapaka Iesu Keriso hamana. Ia hanona aoko'o mai ao bakiro ikoinai pokina Tiramana. <sup>4</sup> Emai aro'ari ikoikiai ia ehore aomai ebakironakia, weiana buonai Tirama aomai ebakironakia ihobonai bariu tiaro'ari haukia aokia katabakirona abomo ketaina. <sup>5</sup> Pokina Keriso ehau haiara ihobonai ai abomo rani bo'ona tahu haiara, ba rani bo'ona ao bakiro 'eumai niapa'ua Keriso paunai. <sup>6</sup> Ai katahau haiara hanona wai aomi ibakirona mai ibamaurimi paunai, ai aomai ebakirona wai aomi abomo ebakirona, pokina ao bakiro weianai tabura katoa'ina haiara weiakia herekiai katokori 'ini ai hau haiara aokiai takori 'ini 'abana. <sup>7</sup> Emai buabeni heremiai hauna ekori

'ini, pokina ai ta'ioibina kipokia nahahau haiara ihobonai ai mai wai kipokia aoka kebakironakia.

<sup>8</sup> Uaho'abamai e, ai tanuatae Asia hanonai taro'ari haukia kato 'iobinakia. Ai hau haiara tahoainakia hanona teapa'ua ki'a baha abomo tepuma ki'a baha, ai katamauri hauna a'i tabuabeni 'apuana. <sup>9</sup> Ai kipomai aomaiai taonobaina hanona aba kata'ari. Ia neiana erama hanona ai kipomai haumaiai a'i kata'ikakauma paunai, 'a 'ariai nibamikiri muenakia Tiramana ikupaianamo kata a'ikakaumana paunai. <sup>10</sup> Ia ehore 'ari ki'a obona herenai ebamaurinamai abomo kebamaurinamai. Haeamona ia tabuabena kebamauri muenamai. <sup>11</sup> Wai abomo katobarainamai emi bahuba'ari ai. Ba bahuba'ari bo'okia weiakia paukiai Tirama keba namonamai, weiana maearima bo'okia katehore namo 'abikia Tirama katebena ai paumaiai.

*Paulo Ena Raona Eba'oruna Hauna Ebahaeaina.*

<sup>12</sup> Emai apa hanona neiana aomai tohanai tabatohana, emai mauri hanopakai abomo emai baihatia'a wai kipokia hanona mai robena mai berona Tirama 'eunai. Ai neiana tababaina hanona hanopaka ena aobero ai aha'i, ia Tirama ena aoko'o hoana hiabunai. <sup>13</sup> Ai wai katotuabina mai obona katobo hauna mo tarere benimi, nanuatae maikoina kato'iobi haraina. <sup>14</sup> Wai bariu obomai a'i tuobo harai re'a au nanuatae wai ai kato'iobi harainamai, weiana eka Obiapaka Iesu Keriso ena mai raninai ai wai tapainimi ihobonai wai ai katoapainamai.

15 Au neiana a'iobi haraina paunai, weiana e'u raona abakorina kawahi 'uai heremi banamo ibaruana katoa'ina. 16 E'u raona aba'oruna hanona kawahi heremi ba kaeao Makedonia, haeamona Makedoniai kamue hanona kamai heremi, ba wai katohore katobaraina'u kaeao Iudea. 17 Wai turaonana e'u raona weiana aba'oruna raninai 'ama'amanai abakorina, u? 'Ao hanopaka raonaraonana ababaina ba rani hamonai 'e mai aha'i ahinana, u? Aha'i 'akina. 18 Tirama hanona aia ibabua 'auna hauna, ihobonai emai 'abi ewahi heremi hauna hanona rani hamonai "e' mai 'aha'i' a'i tahinana. 19 Sila,\* Timoteo mai au wai baiatamiai tairoro aina hauna Tirama Nahuna Iesu Keriso hanona rani hamonai "e' mai 'aha'i' a'i ehinana, ia aonai hanona rani ikoinai 'abi tohana "e' mo nemi-aho. 20 Pokina Keriso hanona Tirama ena 'abi'uai ikoikia eba tohanakia. Weiana buonai Iesu Keriso paunai 'Amen' nahahinana Tirama atana kahabanamona. 21 Wai mai ai kipokia Keriso aonai ebakori 'ininaka hauna hanona Tirama. Ia ehore ebahiabunaka. 22 Ia ena hoa haukai ehore 'auna aika hanona ia 'euna abomo ena Auba Robe aokai ehorotina weiana hanona keba maurinaka hoana.

23 Au Tirama atanai na'abi abomo ia ao'u e'iohina, a'i marobenimi aomi a'i mabahaiarana buonai a'i awahi Korinto. 24 Ai wai emi a'ikakauma a'i katapoki aina pokina emi a'ikakauma etabura, ia ai hanona wai kipokia nahaka haeamo aomi ibanamona paunai.

## 2

1 E'u raona abakorina hanona a'i kawahi

---

\* 1:19: (19) 'ao *Silvano*

heremi aomi a'i mehaiara taearanai. <sup>2</sup> Pokina au wai aomi kabahaiarana hanona tai kehore au kebaonamona'u? Ia wai mo naiami aomi aba abahaiarana haumi. <sup>3</sup> Weiana paunai marere naiana arerena, au kawahi raninai wai au katobaonamona'u haumi aomi a'i mabahaiarana marikina. Pokina au a'iobi haraina au kaonamo hanona wai ikoimiai abomo katoaonamo. <sup>4</sup> Arere benimi raninai ao'u ehaiara abomo epuma maha'u mai beina, weiana hanona aomi kabahaiarana paunai aha'i ia kaba'iobinimi au wai naraona'au ainimi.

*Heremai Beho Tebabai Haukia Ekia Beho Katohina Hao.*

<sup>5</sup> Hau ha ehore 'abana aona ebahaiarana hanona au ao'u mo a'i ebahaiarana ia wai ikoimiai aomi ebahaiara 'apuana. Au a'i ka'abi pahihi ki'a baha ia herenai. <sup>6</sup> Hau weiana ena ki'a 'arana wai bo'omi tohore puma tobena hanona aba etaina. <sup>7</sup> Bariu hanona ena ki'a katohina hao abomo aona katobataburana, aona a'i mabahaiara ki'a bahana ta'una. <sup>8</sup> Ua buonai au wai nanoinimi, wai ia turaona'auai tohana hoana katobaihana. <sup>9</sup> Marere weiana arere benimi ena poki tohana hanona au ka'iobina aia'u tuka'ai tohana rani ikoinai, 'ao aha'i. <sup>10</sup> Wai hau ha ena ki'a katohina hao hanona au abomo ena ki'a kahina hao. Au—ia kahina hao paunai—ena ki'a ahina hao weiana hanona Keriso wairanai ababaina wai paumiai. <sup>11</sup> Weiana hanona Satani kehore a'i me'oinaka marikina, pokina aika hanona ena baihobo akakia aba ha'iobinakia.

*Paulo Ena Nuatae Tito Keihana.*

<sup>12</sup> Au aeao Toroa aiarana Keriso ena pou namona kairoro aina aonai taeara ikaikau au weia

Obiapaka ena aka kababaina. <sup>13</sup> Ia ao'u hanona a'i enamo pokina uaho'abaka Tito weia a'i atabu ahina, haparua ahinana maearima weia haukia herekiai ba aeao Makedonia.

*Aika Hanona Timi Namona Keriso Herenai Nimai.*

<sup>14</sup> Iamo Tirama namo 'abina nabena pokina Keriso nihore rani ikoinai ne'uai ainamai ena mauri taburana aonai katamiahō, ai Keriso pouna namona katairoro aina kate'iohina 'eka maikoinai matoha timi namona nirama otaraina 'abana. <sup>15</sup> Ai hanona timi ha 'abana Tirama wairanai Keriso herenai nimai weiakia timauri mai ti'akauma haukia baiatakiai. <sup>16</sup> Weiakia ti'akauma haukia herekiai ai hanona timi ki'a obona 'ari kemaiaina, weiakia timauri haukia herekiai ai hanona timi namona mauri kemaiaina. Tai etaina aka neiana kebabaina? <sup>17</sup> Ai hanona bo'okia 'abakia aha'i, ia hanona Tirama ena 'abi kawakawa tabanai tibaona, 'a ai hanona 'abi tohana tairoro aina mai aomai tohanai Tirama wairanai mai Keriso aonai ihobona Tirama euhunakia haukia 'abana.

### 3

*'Abi'uai Mahamahana Ena Aka Haukia.*

<sup>1</sup> Turaonana ai kipomai tapai muenamai, u? 'Ao baika tibabaina 'abana, baika herekiai ai ibanamomai marerekia katanuatae ainakia kata'i katawahi heremi, 'ao wai heremiai ibanamomai marerekia kata'i kataeao baika herekia? Aha'i 'akina. <sup>2</sup> Wai hanona ai emai marere, aomaiai tererena maearima ikoikiai te'iohina abomo tetuabina. <sup>3</sup> Ewaira tina harai wai hanona Keriso ena marere, ai tamaiaina, umu ai a'i ererena ia mauri Tiramana ena Auba

Robeai ererena, pihara ahanai a'i ererena ia maearima aonai ererena.

<sup>4</sup> Ai na tapa aiho pokina Tirama wairanai weiana tabatohana Keriso paunai. <sup>5</sup> Ai hanona a'i ta'abi kipomai emai taburai aka neiana tababaina, 'a tabura weiana hanona Tirama herenai nimai. <sup>6</sup> Tirama ehore 'abi'uai apa'uana mahamahana akana katababaina haukiai ebaonamai, 'abi'uai mahamahana neiana hanona rauhuhu pukanai tererena hauna aha'i ia Auba Robe 'euna. Rauhuhu irere hauna hanona 'ari kemaiaina ia Auba Robe hanona mauri kebenaka.

<sup>7</sup> Rauhuhu pihara ahanai ererenakia ba Mose ebena raninai Tirama ena nuabi ewaira tina Mose wairanai ea, ea ki'a baha buonai Isaraela haukia a'i teiha 'ariai 'ariaina, ba rani a'i ehoma'a ea weiana mahari mahari e'akauma. Rauhuhu weiana 'ari nimaiaina hauna nuabi uahomana aonai emai raninai, <sup>8</sup> Auba Robe ena aka weiana mauri nimaiaina hauna nuabina hanona aea keapa'ua aiho! <sup>9</sup> Maearima beho 'ekakiai kehorotina akana enuabi raninai maearima bero kebenakia akana nuabina hanona aea keapa'ua aiho! <sup>10</sup> Nuabi 'uaina hauna enuabi, iamō nuabi apa'uana mahamahana emai hauna paunai nuabi weiana hanona matoha a'i enuabi. <sup>11</sup> Taba emiaho 'apua hauna mai nuabina raninai, kemiaho banaibanai tabana nuabina hanona aea keapa'ua aiho!

<sup>12</sup> Emāi buabeni neiana paunai ta'abi tabura.

<sup>13</sup> Mose hanona mukoai wairana e'aeana pokina Isaraela haukia ea weiana ni'akauma hauna a'i temeihana paunai. Ai hanona aka uahomana a'i tababaina. <sup>14</sup> Aokia hanona tekaiabu toha abomo

bariu rani neianai rauhuhu 'ai'aina pukana tetu-abina aonai ia aokia hanona muko hamona weianai tekaiabunakia. Hau ha Keriso ena mauri aonai ketoto hanona muko weiana kekapare. <sup>15</sup> Bariu rani neianai abomo Mose ena rauhuhu katetuabina raninai, muko hanona aokia nika-iabu ohona mo. <sup>16</sup> Ia hau ha keao Obiapaka herena raninai, muko ia herenai hauna aba ia'i obo. <sup>17</sup> Obiapaka hanona Auba, ba Obiapaka Aubana ae'eai hanona aika rauhuhu herenai ha'abaea. <sup>18</sup> Aika ikoikai wairakai muko keirubu Obiapaka ena nuabi kahabawaira tinana matoha oreore 'abana, ba aokai Obiapaka Aubana niaka hanona aika ia ihobo ihobonai nahaeao nuabi niapa'ua hao apa'ua hao hauna aonai. Obiapaka hanona Auba, ia nihore aka neiana nibabaina.

## 4

### *Kepu Namona Puou Aonai 'Abana.*

<sup>1</sup> Tirama ena aoko'o ai aka neiana ebenamai tababaina, ua buonai ai aomai a'i ni'abe'abe. <sup>2</sup> Ai bunianai haumaea akakia tababai haukia aba tane'e, ai bai'oi akakia a'i tababai abomo Tirama ena 'abi a'i tahina haeaina. Ia 'abi tohana tahina karahi haraina, weianai maearima aokia tohanai kate'jobina ai maearima aea homamai Tirama wairanai. <sup>3</sup> Ia pou namona fairoro aina hauna maearima herekiai ebuni raninai, pa'e weiakia mo kate'ari haukia herekiai ebuni. <sup>4</sup> Satani hanopaka neiana tiramana nihore a'i tia'ikakauma haukia aokia nikaiabunakia paunai, pou namona eana weiana Keriso ena nuabiai nibawaira tinana hauna a'i teiha tinana. Keriso hanona Tirama ihobo ihobona hauna.



<sup>5</sup> Ai kipomai poumai a'i tairoro aina, ia ai tairoro ta'abi Iesu Keriso hanona Obiapaka, abomo ai hanona emi ta'ara'i haumai Iesu paunai. <sup>6</sup> Tirama e'abi etibaha, "Wapura aonai ea merama." Ba Tirama weiana ehore ena eai ai aomai ebaeana, Tirama ena nuabi Keriso wairanai ewaira tina hauna obona taobo mai taihana.

<sup>7</sup> Ai hanona puou 'abana, aomai kepu namona neiana nemiaho, weiana nihore nibaihanakia hiabu apa'uana hanona Tirama herenai nimai, ia ai heremai ai a'i nimai. <sup>8</sup> Taeara bo'okia haeai haeai ai tibatetuanamai iamo a'i ta'eho, taba bo'okia aomai tibarotarinakia iamo aomai a'i ni'abe'abe. <sup>9</sup> Bo'okia ti'oatanamai iamo Tirama ai a'i ehabonamai, rani bo'okia tiahunamai tiba'ehonamai iamo a'i taki'a. <sup>10</sup> Nahomanai rani ikoinai hauanimaiai Iesu ena 'ari tabuana, weiana hanona Iesu ena mauri ai hauanimaiai nemiaho hauna kewaira tina paunai. <sup>11</sup> Ai tamiaho emai mauri aonai rani ikoinai Iesu paunai 'ari tawairana, weiana hanona ai hauanimaiai neiana ke'ari hauna aonai Iesu ena mauri kewaira tina. <sup>12</sup> Weiana paunai 'ari hanona ai aomaiai niaka, ia mauri hanona wai aomiaiai niaka.

<sup>13</sup> Puka robenai na erere aihona, "Au a'ikakauma paunai, a'abi." A'ikakauma hoana hamona weianai, ai abomo ta'ikakauma paunai, ta'abi. <sup>14</sup> Ai ta'iohiba Tirama, eka Obiapaka Iesu 'ari ai ebamikirina hauna, kehore ai abomo Iesu kipokia kebamikiri haemonamai, ba wai mai ai kipokia keaoainaka ia herenai kahakoroti. <sup>15</sup> Taba neiakia ikoikia hanona wai emi namo paunai tababainakia, weiana Tirama ena aoko'o hoana maearima bo'ona bo'ona ketabu ahinakia,

ba namo 'abikia bo'ona Tirama katebena, atana katea'i taeana.

*A'ikakauma Taearanai Nahamauri.*

<sup>16</sup> Ua buonai aomai a'i nira'ora'o. Hauanimai hanona ni'abe'abe, iamo aomai hanona rani ha ha nimaha maha. <sup>17</sup> Hau haiara papana neiana bariu rani papana tahoaina hauna kehore nuabi rarina 'akina mai banaibanaina hauna kemaiana, nuabi weiana hanona eapa'ua ki'a baha ba hau haiara neiana. <sup>18</sup> Ua buonai mahaka hanona taba nahaihanakia haukia herekiaia a'i kemiaho ia a'i naha ihanakia tabakia haukia kahaiha, pokina nahaihanakia tabakia hanona a'i katemiaho homa'a ia a'i nahaihanakia tabakia hanona katemiaho banaibanai.

## 5

<sup>1</sup> Hauanika hanona itu 'abana, aika ha'iohina eka itu neia hanopakai nahamiaho aina hauna katekakina kupa ai itu ha Tirama kehore kebenaran, weiana hanona maearima imakiaia a'i tebabaina ia Tirama kipona ebabaina ituna kemiaho banaibanai. <sup>2</sup> Aika bariu hauanika ituna neianai nahamiaho aina naha'arara 'arara, eka nuatae apa'uana hanona eka itu kupai hauna weiana mauri hauanina pahabatotona habuni 'abana. <sup>3</sup> Aika habuni weiakia kahaba totonakia raninai, mai hauka a'i katetabu ahinaka. <sup>4</sup> Hanopaka ituna hauanika neianai nahamiaho oho aonai nahapuma hoai naha'arara 'arara hanona hanopakai hauanika habunina pahabakuri ahina paunai aha'i, ia mauri hauanina habunina kupai hauna pahabatotona paunai, weiana mauri hauanina kehore 'ari hauanina 'ekana kea'ina mauri

banaibanai hauaninai keao. <sup>5</sup> Tirama hanona aka neiana aika 'eukai eba'oruna, ia ehore Auba Robe ebenaka aka neiana wairai kerama hauna ibatohana.

<sup>6</sup> Ua buonai aika rani ikoinai aoka nitabura. Aika ha'iobina hauanika neianai nahamiaho aonai Obiapaka nemiaho 'ekana herekai hanona atau'ai. <sup>7</sup> Aika hanona a'ikakauma taearanai nahamauri, ia taba nahaiha paukia aha'i. <sup>8</sup> Aika aoka nitabura abomo eka nuatae tohana hauanika ituna neiana kahahabona kahaeao Obiapaka kipokia kahamiaho. <sup>9</sup> Hauanika ituna neianai kahamiaho 'ao kahahabona, 'abi na aha'i, eka nuatae apa'uana tohana hanona Obiapaka aona kahabaonamona. <sup>10</sup> Pokina aika ikoikai Keriso ena bakai apa'uana wairanai kahakoroti kebabakainaka, ha ha namo 'ao ki'a hauani maurinai hababai ihobonai 'arana kaha'ina.

### *Baibua Akana Kahababaina.*

<sup>11</sup> Ai ta'iobina Obiapaka aea kahata'uai aihona paunai maearima tabahi ahinakia. Tirama e'iobi harainamai, ba au nabuabenimi wai abomo aomi tohanai ua pato'iobi aihonamai. <sup>12</sup> Ai hanona heremiai kipomai ibanamomai a'i tahina muena, ia ai hanona wai bero namona tabenimi katoapainamai, ba weiakia maearima ihaihana mo tiapaina ia aokia a'i tiraona harai haukia ekia 'abi katobamuena. <sup>13</sup> Emai babai mai emai 'abi'abi matoha po'o haukia 'abana raninai weiana hanona Tirama atana paunai, ia ai taotipa raninai weiana hanona wai paumiai. <sup>14</sup> Weiana hanona Keriso ena raona'au ehore ai ebahi ahinamai. Ai ta'iobi haraina hau hamona aika ikoikai paukai e'ari, weiana anina aika ikoikai ia kipokia ha'ari. <sup>15</sup> Keriso maearima ikoikiai paukiai e'ari

weiana hanona bariu temiaho haukia ia kipokia ekia miahoai a'i katemauri, 'a Keriso ia paukiai e'ari haeamona emikiri hauna paunai katemauri.

<sup>16</sup> Ua buonai bariu rani neianai niaoaia ai hau ha hanopaka ena raonaraona taearanai a'i kata'uahina, 'uainai Keriso hanona ua ta'uahi aihona ia bariu hanona ua homana a'i taranonana.

<sup>17</sup> Hau ha Keriso aonai nemiaho raninai, ia hanona aba maearima mahamahana, mauri 'ai'aina aba ekapare ia aba maearima mahama-

hanai eao. <sup>18</sup> Taba neiakia ikoinai hanona Tirama ebabainakia. Tirama ehore ia mai aika baiataka ebabaibuana Keriso paunai, ba baibua akana ebenaka maearima kahamai ainakia ia ena hauai kateao.

<sup>19</sup> Tirama ehore Keriso aonai ia mai hanopaka maearimakia baiataka ebabaibuana, maearima ekia ki'a a'i etuabinakia. Ba baibua 'abina neiana ebenamai katahinana. <sup>20</sup> Ua buonai ai hanona Keriso pinanai taeao, Tirama hanona ai pinamaiai nehina benimi. Ai Keriso atanai wai tahina benimi. Wai Tirama kipokia katobaibua.

<sup>21</sup> Keriso hanona ki'a hauna aha'i, 'a aika paukai Tirama ehore ki'a haunai\* ebaona, weiana aika hanona Keriso aonai bero haukai kahaeao Tirama wairanai.

## 6

### *Tirama Ena Aka Haukia Hanona Atetua Aokiai Katebapahihi.*

<sup>1</sup> Ai Tirama kipokia taka haemo haumai tabahi ahinimi, Tirama ena aoko'o hoana toa'ina hauna a'i katobaki'ana. <sup>2</sup> Pokina Tirama e'abi etibaha,

---

\* **5:21:** (21) 'ao ki'a ia'i obo tabanai

“E'u nuatae ranina tohanai  
aiami aona,  
abomo bamauri beraurana tohanai  
abarainimi.”

Isa 49.8

Au wai nahina benimi Tirama ena nuatae ranina weiana hanona bariu, bamauri beraurana weiana abomo bariu.

<sup>3</sup> Hau ha aona a'i tamabakai'au kai'auna, weiana maearima emai aka beho a'i katetabu ahina paunai. <sup>4</sup> Ia wairakiai ai kipomai tabatohanamai ai Tirama ena aka haumai taeara haeai haeai ikoikiai aokiai, weiakia ao aro'ari, hau haiara, mai atetua aokiai tabapahihi, <sup>5</sup> te'atinamai, teba wapuranamai abomo to'ukiai tehari abunamai, taka 'ari, a'i taparua harai abomo mare'a ta'ari, <sup>6</sup> emai robeai, aotipai, bapahihiai abomo hoahoa namokiai, Auba Robe taburanai mai maearima iraona'auaikiai maearima tabaihanakia ai Tirama ena ta'ara'i haumai. <sup>7</sup> 'Abi tohana tahina karahina, mai Tirama ena hiabuui taka. Bero akakia hanona emai huari tabakia imamai abira abirai ta'inakia.

<sup>8</sup> Baika atamai tea'i taeana baika atamai tea'i ki'ana, tebapo'onamai abomo temariki ainamai, iamo ai Tirama ena aka haumai taeao. Maearima bai'oi haumai tibaonamai, iamo ai hanona 'abi tohana tahinana. <sup>9</sup> Maearima a'i te'io binamai, ia Tirama ne'io binamai. Maearima tiraonana aba ta'ari, ia maurimai tamiaho. Puma rarina tibahoinamai, ia a'i ta'ari bahana. <sup>10</sup> Aomai tibahaihaina ia rani ikoinai taonamo. Uraru haumai 'abana ia maearima bo'okia tabaobianakia. Heremai taba aha'i moioina, 'a taba ikoikiai hanona ai 'eumai tamiaho.

11 Emai hau Korinto ai haumi e, taba ikoikiiai wairamiai tahina pounakia, aomai ikoinai heremiai tabawaira tinana. 12 Ai hanona wai taoko'o ainimi ia wai hanona ai a'i tuaoko'o ainamai. 13 Au wai nahina benimi matoha naha'u 'abana, ai tababai heremiai ihobona pato babaina heremaiai, aomi ikoinai heremaiai katobawaira tinana.

*Aika Hanona Mauri Tiramana Ena Marea Robena.*

14 A'i tia'ikakauma haukia kipokia a'i katobahaeamo. Bero mai ki'a aea katebahamomo aiho? Ea mai wapura hanona a'i katemiaho hamomo. 15 Keriso mai Tiaporo aokia aea katebahamomo aiho? A'ikakauma hauna mai a'i nia'ikakauma hauna ohi ekia raona hanona hamonai a'i kemi-aho. 16 Tirama ena marea robe mai kaiba'uku terarua hanona aea katebahamomo aiho? Aika hanona mauri Tiramana ena marea robena. Tirama kipona na e'abi aiho, "Au hanona ia kipokia katamiaho oioi, abomo a'i kahabonakia. Au hanona ia ekia Tiramai kaeao, ia hanona au e'u maearimai kateao."

Lev 26.12

17 Ua buonai Tirama e'abi etibaha, "Wai hanona ia tomohabonakia herekiai tomokapare. Opu akakia a'i katobabai. Ba au wai ka'i taeanimi.

Isa 52.11; Esk 20.34, 41

18 Au hanona wai Hamamiai kaeao, wai hanona au naha'u haukia mai babi'ekia ai katoao. Tabura ikoinai Obiapakana, e'u 'abi neiana."

2Sam 7.14

## 7

<sup>1</sup> Ua buonai, e'u raona'au haumi ikoimiai e, 'abi'uai neiāna herekai ebabaina paunai, hauanika mai aubaka tibaopunakia tabakia ikoikiai herekiai kahakapare eka mauri kahabamaha mahanakia, 'a Tirama kahamariki aina eka mauri maikoina ia kahabena kaharobe.

*Paulo Ena Aonamo Korinto A'ikakauma Haukia Paukiai.*

<sup>2</sup> 'Ekamai katohorena aomia. Ai hau ha her-enai beho a'i tababaina, hau ha ena a'ikakauma a'i ta'i ki'ana, abomo hau ha a'i ta'oina ena taba a'i ta'i. <sup>3</sup> 'Abi neiāna nahinana hanona puma kabenimi paunai aha'i. Ia 'uainai ahina ben-imi 'abana, ai katamauri 'ao kata'ari re'a wai hanona rani ikoinai aomia katomiaho. <sup>4</sup> Au hanona wai na'i taeanimi mai napai ki'a bahanimi, ua buonai emai hauhaiara aokiai ao'u nitabura abomo naonamo ki'a baha.

<sup>5</sup> Ai Makedonia ai takara'au raninai abomo a'i tarai 'apua, atetua haeai haeai aokiai tamiaho, baika kipokia tabaiara, aomai mai ta'umai tami-aho. <sup>6</sup> 'A ao 'abe'abe haukia aokia niba tabu-ranakia Tiramana ehore Tito euhuna heremaiai ba aomai eba taburanakia. <sup>7</sup> Weiana ena mai mo aha'i, ia wai aona aea tobatabura aihona pouna taona hanona aomai etabura, abomo tonuatae katoihana'u, here'uai tobabai ki'a hauna turaona kabe mai emi aka tabura au pau'uai hauna pouna ehina benamai hanona e'u aonamo eapa'ua ki'a baha.

<sup>8</sup> E'u marere weiana atiu ahina heremiai hauna aomi ebaro'arina re'a, bariu au weiana

a'i na'arara aina. 'Uainai, rani papana a'arara aina pokina araonana marere weiana aomi ebaro'arina. <sup>9</sup> Ia bariu hanona ao'u ninamo. Weiana aomi tearo'ari paunai aha'i, ia emi ao aro'ari ehore ebaraona kabenimi paunai naonamo. Wai aomi tearo'ari hanona Tirama ena nuataeai erama, ua buonai ai paumaiai ki'a ha a'i totabu ahina. <sup>10</sup> Ao aro'ari weiana Tirama ena nuataeai nirama hauna hanona maearima aona nibahaeaina nibaraona kabena bamauri ketabu ahina, weiana hauna a'i kaha'arara aina. Ia ao aro'ari hanopaka ena nuatae paunai nirama hauna hanona 'ari kebaramana. <sup>11</sup> Ao aro'ari neiana Tirama ena nuataeai erama hauna paunai heremiai ebaramanakia tabakia katoraona harainakia. Toaka harai, emi beho aha'i hauna tobatoha haraina, beho topuere aina, Tirama tota'u aina, raona'au nuataenai toaka, beho tobaberonakia. Wai 'eka ikoikiai emi beho aha'i hauna tobawaira tinana.

<sup>12</sup> Au arere benimi hanona beho ebabaina hauna 'ao herenai beho erama hauna paunai aha'i, 'a Tirama wairanai wai aea turaona'auai ki'a bahanamai hauna kewaira tina paunai arere benimi. <sup>13</sup> Weiana ehore aomai eatabura haraina.

Weiana mo aha'i, Tito ena aonamo paunai aomai abomo enamo ki'a baha pokina wai tobaraina aona toba namona paunai. <sup>14</sup> 'Uainai au Tito wairanai apainimi, ba wai au a'i toba-haumaeanu. Tahina benimi tabakia ikoikiai hanona 'abi tohakia, ihobonai mo tobatohana ai Tito wairanai tapainimi hauna hanona 'abi tohana. <sup>15</sup> Tito ena raona'au heremiai hauna niapa'ua ki'a baha, pokina ia niraona 'inina wai



ikoimiai aiana toka'aina abomo toa'i taeana mai ta'umi mai marikimi. <sup>16</sup> E'u aonamo eapa'ua pokina a'ioibi harai ki'a bahanimi wai emi hoahoa tenamo.

## 8

### *Makedonia A'ikakauma Haukia Mai Aonamokia Beruberu Tebaibeni.*

<sup>1</sup> Uaho'abamai e, ai taba'io binimi Tirama hanona ena aoko'o hoana ia ena marea maearimakia Makedoniai haukia ebenakia. <sup>2</sup> Ia hau haiara rarina aonai temiaho abomo teuraru ki'a baha, iamo mai aonamokia beruberu bo'ona tebaibeni. <sup>3</sup> Au wai heremiai ia nabatohanakia, taba herekiai hauna bo'ona tebaibeniaina, abomo kipokia ekia nuataeai tebaibeni banaina. <sup>4</sup> Ia rani bo'ona tenoinamai, ia abokiamo Tirama ena maearima Ierusalem mai haukia ibaraikia akana katebabaina. <sup>5</sup> Ekia baibeni weiana hanona eapa'ua ki'a baha ba ai taraonana hauna. Kori'uaina hanona kipokia tebaibeni ainakia Obiapaka 'eunai kateao, haeamona Tirama ena nuataeai kipokia tebaibeni ainakia ai 'eumai kateao.

<sup>6</sup> Weiana buonai Tito tanoina, ia aba beruberu akana neiana baiatamiai ea'i ramana paunai, kebarainimi keaomo aka neiana katobaorena.

<sup>7</sup> Taba ikoikiai hana tubabai harainakia, emi a'ikakaumai, emi 'abiai, emi 'ioibai, emi nuataeai, abomo emi raona'au heremaiai haunai. Ua buonai ai tanuatae beruberu akana neiana abomo katobabai haraina.

<sup>8</sup> Au rauhuhu ha'i nahorotina. Ia e'u nuatae hanona baika ekia baraibarai aea homana hauna kabawaira tinana heremiai ba ka'ioibina wai emi raona'au hanona tohana. <sup>9</sup> Wai aba to'ioibina

eka Obiapaka Iesu Keriso ena aoko'o hoana aea eapa'ua aiho. Ia hanona obia hauna, ia wai paumiai uraru haunai eao, pokina ena uraruai wai kebaobianimi.

<sup>10</sup> Au e'u raona barai barai akana neiana herenai hana nahomana, wai taba ihau murikai toa'i ramana hauna patobaorena hana mai emi namo. Aka neiana hanona wai toa'i rama 'uaina abomo tobabaina mai aomi ikoinai. <sup>11</sup> Ua buonai bariu aka neiana katobabaina keaomo katobaorena. Ia'iramana tonuatae aina paunai heremiai temiaho tabakia katoba orena. <sup>12</sup> Wai katobaibeni mai nuataemi raninai, Tirama kehore wai heremiai temiaho tabakia katobena haukia kea'i taenakia, 'a taba heremiai aha'i hauna robana a'i keahuna.

<sup>13</sup> Wai heremiai kepuma ba baika herekiai ke'ama'ama, weiana hanona e'u nuatae aha'i. Ia nanuatae ha ha ikoikai kahaihobo. <sup>14</sup> Bariu rani neianai heremi taba tebo'o haumi tekapu haukia katobarainakia, ba wai emi kapu raninai ia ekia taba katebo'o aonai wai katebarainimi. Weiana ikoikiai barai barai ihobona kaha'ina. <sup>15</sup> Puka robenai aba ererena 'abana, "Bo'ona ebararo hauna 'euna a'i ebo'o ki'a baha, bita mo ebararo hauna 'euna a'i ebita 'aki."

*Paulo Aka Haukia Tito Mai 'Abana Ohi Euhunakia Teao Korinto.*

<sup>16</sup> Tirama namo 'abina nabena, pokina emai nuatae katarainimi hauna ihobonai Tito abomo nenuatae. <sup>17</sup> Emai noi ia kewahi heremiai hauna ea'i taena. Weiana emai noi paunai mo aha'i, ia kipona enuatae ki'a baha kewahi heremi. <sup>18</sup> Uaho'abaka ha tauhuna Tito ohi tiwahi, ia hanona pou namona neiroro aina paunai Tirama

ena marea maearima ikoikiai tibanamona hauna. <sup>19</sup> Weiana mo aha'i, ia hanona Tirama ena marea haukia tehore tea'i taeana ai ke'abanamai kebarainamai, kipokia eka raona'au baibeni monina neiana kataeaoaina Ierusalem. Weiana hanona eka nuatae baraibarai akana kewaira tina Obiapaka ena nuabi paunai. <sup>20</sup> Ai ta'ima harainamai pokina ai raona'au baibeni monina rarina neiana kata'imana aonai hau ha beho ha a'i metabu ahina a'i me'abi ki'a paunai. <sup>21</sup> Ai tanuatae aka namona mai berona katababaina Obiapaka mo wairanai aha'i ia maearima wairakiai abomo.

<sup>22</sup> Ba uaho'abaka haeai ha abomo tauhuna kipokia tiwahi, rani bo'okia tahobona ba taihana ia hanona ena nuataeai ebaraibarai. Bariu ia aba e'iobi harainimi aonai nenuatae ki'a baha kebaraibarai.

<sup>23</sup> Tito hanona au 'aba'u taka haeamo wai ibaraimi. Mai uaho'abaka weiakia ia kipokia tiwahi haukia hanona Tirama ena marea haukia tea'i taeanakia haukia Keriso ena nuabi katebawaira tinana paunai. <sup>24</sup> Ua buonai emi raona'au hoana katoba ihanakia, weiana Tirama ena marea haukia ikoikiai katebatohana abomo kate'iobina wai tapainimi hanona ebero.

## 9

### *Baibeni Akana Katobabaina Tirama Ena Maearima Ibaraikia.*

<sup>1</sup> Tirama ena marea maearima robekia Iudeai haukia ibaraikia akana pouna karere benimi hanona a'i nanuatae. <sup>2</sup> Pokina au a'iobina wai tonuatae katobaraibarai, ba a'ikakauma haukia Makedoniai haukia wairakiai apainimi,

a'abi atibaha, “Akaia haukia hanona aba ihau murikai teba'oru katebaibeni.” Emi baibeni taburana weiana ehore ebahi ahinakia katebaibeni. <sup>3</sup> Bariu uaho'abaka neiakia nauhunakia tiwahi ena poki hanona emai apa wai ahamiai hauna anina a'i meaha'i paunai. 'A au ahina benimi ihobonai wai emi baibeni tabana hanona katoba'oruna. <sup>4</sup> Weiana Makedonia haukia baika kipokia patawahi ba pateihanimi a'i toba'oru raninai, wai patohaumaea mo aha'i, tapainimi hauna paunai ai patahaumaea ki'a. <sup>5</sup> Ua buonai au araonana kenamo uaho'abaka neiakia kanoinakia kate'uai katewahi heremi emi beruberu tabana to'uahi 'uaina hauna katoba'oruna. Weiana ai katakara'au aonai barai barai tabana hanona aba e'oru, weiana kehore kebawaira tinana wai tobaibeni hanona mai aomi ikoinai, ia bahi ahi paunai aha'i.

<sup>6</sup> Katoraona haraina, ube bita 'aki kebatonakia hauna aniani bita 'aki mo keu'aunakia, 'a ube bo'ona kebato hauna aniani bo'ona keu'aunakia. <sup>7</sup> Wai ha ha kipomi emi nuatae ihobonai katobaibeni, ia mai 'arara 'ararami 'ao bahiahi paunai a'i katobaibeni. Pokina Tirama hanona maearima aona namonai nibaibeni hauna niraona'au aina. <sup>8</sup> Tirama hanona herenai etaina ena aoko'o hoana kebenimi hanona kebeni banainimi, ba rani ikoinai taba namokia heremiai kebo'o, weianai wai emi barai barai akakia namokia bo'ona katobabainakia. <sup>9</sup> Puka robenai tererena 'abana etibaha,  
 “Ia nihore taba namokia bo'okia  
 uraru haukia nibenakia aona  
 mai beruberunai,  
 ena aka bero hanona kemiaho  
 banaibanai.”

Sal 112.9

<sup>10</sup> Tirama weiana nihore biraura hauna ube nibena mai aniani nibena hauna kehore ube bo'ona kebenimi katobato, keba'omunakia, emi aka namokia buabuakia bo'okia kebaramanakia. <sup>11</sup> Ia wai heremiai taba ikoikiai kebabo'onakia ba katobaibeni rani ikoinai. Weiana emi beruberu tabakia kataeaoainakia herekiai hanona maearima bo'ona namo 'abina katehinana Tirama herenai. <sup>12</sup> Baibeni akana neiana tubabaina hanona Tirama ena maearima robekia ibaraikia akana mo a'i nibabaina, 'a aka neiana kehore maearima bo'ona abomo namo 'abina Tirama katebena. <sup>13</sup> Emi baibeni akana neiana nihore Keriso ena pou namona tohina pouna mai akana tubabaina hauna nibatohana, abomo emi beruberu akana ia herekiai mai maearima ikoikiai herekiai hauna nibatohana, weiana paunai maearima Tirama katebanamona. <sup>14</sup> Kate bahuba'ari wai ahamiai raninai, kateraona ki'a bahanimi pokina Tirama ena aoko'o hoana apa'uana wai heremiai paunai. <sup>15</sup> Namu 'abina Tirama kahabena ena beruberu apa'uana herekai hauna paunai, beruberu weiana pouna 'abiai kahahina hina haraina hanona a'i ketaina.

## 10

### *Paulo Ena Aka Neuhoreaina.*

<sup>1</sup> Maearima baikā ti'abi au wai heremiai namiaho hanona na'amari'amari, 'a naeao atau'ai hanona natabura. Au Paulo kipo'u nahore Keriso ena ao 'amari'amari mai ena rabo harai ai nanoinimi, <sup>2</sup> weiakia te'uahinamai ti'abi hanopaka ena taearai tamauri na tihoma haukia herekiai ka'abi pahihī, ia au wai nanoinimi emi babaiai katobero, kawahi heremiai raninai

a'i pa'abi pahihi. <sup>3</sup> Hanopaka nei ana aonai nahamiaho iamo aika hanona hanopaka haukia tēhuari taearanai a'i nahahuari. <sup>4</sup> Eka huari tabakia hanona hanopaka ena huari tabakia 'abakia aha'i, ia Tirama ena huari tabakia taburakia. Weiakia tiaporo ekia miaho 'ekakia pahihikia abomo kateahu 'iti'itinakia. <sup>5</sup> Aika maearima ekia raonaraona bai'oikia mai apa tabakia weiakia Tirama i'iohina taearana tikaiabuna haukia nahahu 'iti'itinakia, maearima aokia maikoinai nahaeaoainakia Keriso aiana kateka'aina. <sup>6</sup> Wai ikoimiai Keriso aiana aba tuka'ai ore haraina aonai, ai kataba'oru weiakia aiana a'i tika'aina haukia puma katabahoa ainakia.

<sup>7</sup> Wai hanona taba kapekia mo toihanakia. Hau ha niraonana ia Keriso ena maearima raninai, ia kipona keraona harai 'uaina, pokina ai abomo Keriso ena maearima ia 'abana. <sup>8</sup> Obiapaka hiabu ebenamai hanona emi mauri kataba taburanakia, ia a'i kata'i ki'anakia, ua buonai hiabu weiana napai ki'a bahana re'a, weiana a'i nahaumaea aina. <sup>9</sup> Au a'i nanuatae wai katoraonana kabata'unimi buonai marere neiakia narerenakia. <sup>10</sup> Hau baikā te'abi tetibaha, "Paulo ena marere 'abikia hanona tepuma abomo tetabura, 'a ia kipona tohana nimai herekai hanona ia e'abe'abe ena 'abi abomo te'amari 'amari taba aha'i." <sup>11</sup> Maearima na ti'abi aihō haukia kate'iohi haraina, marere aokiai taba tarerenakia haukia mai ai tohamai katawahi heremiai taba kata babainakia haukia hanona ihobomo a'i tehaeai.

<sup>12</sup> Ai a'i tanuatae maearima weiakia kipokia tiba apa'uanakia haukia kipokia a'i kataba ihobonamai. Ia hanona ekia aotipa aha'i.

Ia kipokia baiatakiai ekia babaiai kipokia tibaihobo aina. <sup>13</sup> Ia ai emai apa hanona a'i kekabanai ki'a baha, ia Tirama aka ebenamai katababaina hauna 'ekana aonai mo kemiaho, wai abomo aka weiana aonai totabura. <sup>14</sup> Ai emai apa hanona a'i eao ki'a baha, Keriso ena pou namona tawahiai 'uaina heremiai paunai, emai apa 'ekana a'i takahaboaina. <sup>15</sup> Ua buonai Tirama emai aka 'ekana e'uahina hauna abihanai maearima baika aka ihobona tibabaina hauna a'i tapaina. 'A ai emai buabeni hanona wai emi a'ikakauma keapa'ua ba ai emai aka Tirama e'uahina heremiai hauna abomo keapa'ua. <sup>16</sup> Weiana paunai ai hanona pou namona katairoro aina hanopaka baika weia wai abiamiai maearimakia weiakia tai ha a'i eiroro 'apua 'ekakia haukia herekiai. Pokina hau ha ena aka 'ekanai aka aba tebabaina hauna a'i katapaina.

<sup>17</sup> Puka robenai tererena 'abana,  
 “Tai nenuatae keapa hanona  
 Obiapaka taba ebabaina hauna  
 meapaina.”

Ier 9.24

<sup>18</sup> Pokina maearima ha kipona namona nehina hauna Obiapaka ia a'i nia'i taeana, ia Obiapaka kipona nihore maearima nibatohana enamo hauna nia'i taeana.

## 11

*Paulo Mai Iuhubeau Haukia Bai'oikia.*

<sup>1</sup> Au nanuatae hanona katoiha haona'u, napo'o 'apua re'a, ia tomoiha haona'u. <sup>2</sup> Au hanona wai nauhore ainimi, matoha Tirama neuhore

ainimi 'abana. Wai hanona uaho rari namona 'abana, 'abi'uai ainimi hau hamona katoatawana, weiana hanona Keriso. <sup>3</sup> Ia au ao'u niaro'ari, pokina 'erau ehore Eba e'oina ebahureana ihobonai wai abomimo raona ki'a obokia katehore aomi katebahureanakia Keriso ikutiaina taearana tohana a'i tomohabona. <sup>4</sup> Pokina hau ha nimai Iesu ai tairoro aina hauna aha'i ia Iesu haeai ha neiroro aina hauna a'i tukaiabuna ia tua'i taeara mai aonamomi, abomo Auba Robe mai pou namona heremaiai to'o haukia a'i tua'i taeanakia ia auba haeai mai pou haeaimo neiroro ainakia haukia tua'i taeanakia.

<sup>5</sup> Au naraonana iuhubeau haukia apa'uakia na tiho haukia tiwahi heremi hanona a'i tenamo ki'a baha ba au. <sup>6</sup> Iamo taina, pa'e 'abi'abiaiai hanona a'i etaina'u, ia aotipai hanona etaina'u, neiana hanona rani ikoikiiai mai taeara ikoikiiai aokiai tabawaira tina haraina heremiai.

<sup>7</sup> Tirama ena pou namona heremiai airoro aina hanona 'ara'u a'i atabuna, hoa weianai kipo'u aba'aera 'aerana'u wai ka'i taeanimi paunai. Ba weiana hanona ababai ki'a, 'u? <sup>8</sup> Au wai baiatamiaiai aka aonai, Tirama ena marea haukia baika aiara haeai haukia tebaraina'u, au hanona herekiaiai moni a'i 'abaeana, weianai wai kabarainimi paunai. <sup>9</sup> Au heremiai amiaho aonai moniaiai patobaraina'u paunai a'i abaro'arinimi, uaho'abaka Makedoniai temai hanona taba anuataeai haukia ikoikiiai tebena'u. Rani 'uainai ihobona mai rani wairakai, abomo au hanona aro'ari a'i kabeni 'apuanimi. <sup>10</sup> Keriso ena 'abi tohana ao'uai nemiaho haunai, na'abi au e'u apa neiana hauna Akaia hanona maikoina aonai hau ha a'i keba'orona. <sup>11</sup> A'i naraona'au ainimi



paunai na na'abi aiho, 'u? Aha'i. Tirama e'ioibina naraona'au ainimi.

<sup>12</sup> Au bariu 'ara a'i natabuna hauna kababai to'ona weiana iuhubeau haukia na tiho haukia baika ekia apa 'abina tehinana tetibaha, "Ia hanona aika kipokia taeara hamonai nahaka," hauna kaba'orona paunai. <sup>13</sup> Pokina hau weiakia hanona iuhubeau haukia tohakia aha'i, ia hanona iuhubeau haukia bai'oikia, ekia akai hanona tibi'oi, abomo ihakia tibahaeainakia matoha Keriso ena iuhubeau haukia 'abana. <sup>14</sup> A'i kahamaharea, pokina Satani abomo kipona ihana ebahaeaina matoha ea aneruna 'abana. <sup>15</sup> Ua buonai ena iuhubeau haukia ihakia kateba haeaina matoha bero akana tibabaina haukia 'abana hanona herekiai a'i epahihi. Muriai hanona ekia babai ki'a obokia ihobokiai 'arakia katea'i.

*Paulo Ena Hauhaiara Iuhubeau Akana Aonai.*

<sup>16</sup> Na'abi mue mo, hau ha a'i meraonana au hana po'o hau'u. Ia ua turaona aihona'u raninai, tomoa'i taeara'u matoha po'o hau'u 'abana ba au papana kapa 'apua. <sup>17</sup> Au taba na'uahina hauna Obiapaka herenai a'i emai, apa 'abi'abinai na'abi hanona matoha po'o hauna ha 'abana. <sup>18</sup> Ia maearima bo'ona hanona hanopakai taba taba tebabai haukia tiapainakia, ba au abomo uamo kahoma.

<sup>19</sup> Wai kipomi turaonana toaobero ki'a baha, ua buonai po'o haukia hanona tua'i taeara. <sup>20</sup> Wai hau ha neuhuaohuaonimi, ni'oi'oinimi, 'ao nibapo'o po'onimi, heremiai nibaro'e, 'ao wairami nibo'anakia hanona tua'i taeara. <sup>21</sup> Au hanona ua a'i nababai aiho. Wai turaonana au na'abe'abe

paunai ua a'i nababaina, 'ao ua a'i nababaina hauna kahaumaeana, 'u?

Ia hau ha taba ha keapaina raninai, (au na'abi matoha po'o hauna 'abana) au abomo kapa ia 'abana. <sup>22</sup> Ia Heberu haukia, au abomo Heberu hau'u. Ia Isaraela haukia, au abomo Isaraela hau'u. Ia Aberahamo 'aba'abana, au abomo Aberahamo 'aba'abana. <sup>23</sup> Ia Keriso ena ta'ara'i haukia, u? (Au na'abi'abi matoha beau'ari hauna ha,) ia au hanona ta'ara'i hau'u namo'u ba ia. Au hanona aka tabura ki'a baha, rani bo'okia awapura, te'ati ki'a bahana'u, abomo rani bo'okia hereka 'akinai mo pateba'arina'u. <sup>24</sup> Rani ima Iuda haukia i'ati pumakia ikoinai harau aihau 'ababani hamomo (39) tebena'u. <sup>25</sup> Rani aihau Roma haukia matiuai te'atina'u, abomo rani hamona piharai teahuna'u. Rani baihau ahi aehe'au haukia teuhu, ba baiatakiai ha hanona wapu hamona maikoina 'aku aonai abure. <sup>26</sup> E'u kaoao bo'okia aokiai au hanona ki'a bo'okia 'eka neiakiai atabu ahi, tou atekia herekiai, bainao haukia herekiai, kipo'u e'u rama haukia mai rama haeai haukia herekiai, ki'a baika hanona aiara apa'uakia aokiai, hano'akukiai mai 'akupakai atabu ahi, haeamona tihatia'a bai'oina'u haukia herekiai ki'a atabu ahi. <sup>27</sup> Au hanona aka mai aro'ari, rani bo'okia a'i aparua, mare'a a'ari abomo 'ako'u e'ororo, rani bo'ona aniani here'u eaha'i, e'u parua 'ekana eaha'i abomo habuni'u eaha'i. <sup>28</sup> Weiakia mo ikupaiakia aha'i, ia rani bo'ona Tirama ena marea haukia 'eka haeai haeai temiaho haukia i'imakia paunai ao'u niaro'ari. <sup>29</sup> Hau ha ni'abe'abe raninai au abomo na'abe'abe, hau ha ki'a aonai tibakatotona rani-nai au ao'u nihaiara.

<sup>30</sup> Au kapa raninai, taba weiakia au e'u 'abe'abe tibawaira tinana haukia kapainakia. <sup>31</sup> Tirama e'jobina au a'i nabai'oi. Ia hanona Tirama eka Obiapaka Iesu Keriso Hamana, ia atana kaha-banamona banaibanai. <sup>32</sup> Au Damaseko ai ami-aho raninai obia 'arana atana Areta ena Kabana hauna ehore 'ima haukia aiara apa'uana pa'abina 'akonai ehorotinakia katebirina'u. <sup>33</sup> Ia uaho'abaka baika tehore areha ha aonai teu-tana'u pihia 'ererenai tebaririna'u, ia herenai abeau 'akaumana.

## 12

### *Paulo Ena Mahabanai.*

<sup>1</sup> Apa hana taba namona ha a'i nibaramana, ia au hanona napa mo. Bariu Obiapaka taba baika mahabanaiai mai ibawaira tina taearanai ebai-hana'u haukia robakia kahunakia. <sup>2</sup> Ihau harau haea bani teao aonai au Keriso ena maearima ha a'jobina hauna tea'i taena teaoaina kupa ibaihauna hauna aonai. (Au a'i a'jobina, neiana hanona hauaninai eao 'ao aubanai eao, Tirama kipona mo e'jobina.) <sup>3</sup> Na'abi mue mo, hau neiana hanona tea'i taena teaoaina Paradiso aonai. (Au a'i a'jobina, neiana hanona hauaninai eao 'ao aubanai eao, Tirama kiponamo e'jobina.) <sup>4</sup> Abomo weia 'abi baika maearima pinakiai patehina a'i petainakia, mai taba weiakia poukia maearima a'i katehina haukia aiakia eo'o. <sup>5</sup> Au hau neiana hauna kapaina, ia au kipo'u a'i kapaina'u, haemona taba weiakia e'u 'abe'abe tibawaira tinana tabakia haukiamo kapainakia.

<sup>6</sup> Au panuatae papa raninai, au hanona po'oai a'i paeao pokina au hanona 'abi tohana pahinana.

Ia a'i kapa, pokina au a'i nanuatae wai ha au taba ababai toihana'u mai ahina urukia to'o haukia paukiai a'i tomotibaha au hanona apa'ua ki'a baha.

*Paulo Hauaninai Haiara Ha Emiaho A'i Keapa.*

<sup>7</sup> Taba namoabukia aihanakia paukiai a'i mapa ki'a baha hanona Tirama hauani'uai haiara rarina ha ehorotina keba'orona'u, Satani hanona haiara neiana aonai niaka keba 'ehona'u abomo keba'orona'u a'i mapa. <sup>8</sup> Rani aihau abahuba'ari Obiapaka anoina haiara neiana here'uai hauna kea'i obona. <sup>9</sup> Ia Obiapaka ehina bena'u etibaha, "E'u aoko'o hoana ikupaiana mo kabeni'o, pokina oi nu'abe'abe aonai e'u hiabu hanona niapa'ua ki'a baha." Ua buonai e'u 'abe'abe 'ekakiai napa hanona ao'u ninamo ki'a baha, pokina Keriso ena hiabuai ke'aeana'u paunai. <sup>10</sup> Keriso paunai au na'abe'abe, 'abi ki'a obokia tehina here'uai, tibahau haiarana'u, ti'oatana'u abomo tibatetuana'u aokiai ao'u ninamo. Pokina au na'abe'abe aonai au hanona natabura toha.

*Paulo Ena Aoaro'ari Korinto Haukia Herekiai.*

<sup>11</sup> Wai tobahi ahina'u paunai au nababai matoha po'o 'abana. Wai hanona pou'u namona patohinana haumi. Iamo taina e'u namo aha'i re'a, ia emi iuhubeau haukia apa'uakia na tiho haukia weiakia au a'i tetara haona'u. <sup>12</sup> Au baiatamiai amiaho aonai ao'u abapahihina, hoa haeai haeai mai bata'u ta'u huri akakia mai hiabu hoakia ababai haukia tehore tebatohana'u au hanona Keriso ena iuhubeau hau'u ha. <sup>13</sup> Tirama ena marea haukia 'eka haeai haeai temiaho haukia herekiai aka ababainakia haukia ihobokia mo wai heremiai ababai. Ia wai heremiai hanona

'ara'u a'i atabuna. Weiana hanona ababai ki'a raninai, e'u ki'a tomohina haona.

<sup>14</sup> Bariu nei ana hanona rani ibaihauna au aba'oru kabaki bakinimi, abomo au hanona a'i kabaro'arinimi. Pokina au hana wai mo nanuatae ainimi, ia emi kepu a'i nanuataeai. Haeamona miori hana hama hina ekia taba a'i kateba'oru, iamo hama hina haukia katehore miori ekia taba kateba'oru. <sup>15</sup> Ua buonai au hanona mai aonamo'u e'u taba ikoikiai kabenimi mai au kipo'u abomo kabaibeni aina'u wai ibaraimi paunai. E'u raona'au niapa'ua heremiai hanona emi raona'au keko'iko'i here'uai, u? Aha'i, ua a'i kehoma.

<sup>16</sup> Wai ikoimiai to'iohina, weiana au hanona puma a'i abenimi, iamo hau baika ti'abi au hanona aba haoreanimi bai'oi ai abarewanimi. <sup>17</sup> Aea a'oi aihonimi? Auhunakia haukia herekia a'oinimi emi taba a'inakia, u? Aha'i, to'iohina au weiana a'i ababaina. <sup>18</sup> Au Tito auhuna ewahi heremi aonai uaho'abaka ha abomo auhuna teraru tewahi, ba Tito e'oinimi emi taba ea'inakia, u? Aha'i, Tito mai au tararu hanona aomai hamonai taka abomo taeara hamonai taka'a.

<sup>19</sup> Wai pa'e turaonana rani ikoinai ai hanona kipomai emai bero taearana heremiai tatabuna, u? Aha'i. Tirama wairanai ai hanona Keriso ena aka haumai 'abi neiakia tahinanakia, abomo taba tababai haukia ikoikiai hanona wai emai hau ki'ami ibaraimi paunai. <sup>20</sup> Au hanona ao'u niaro'ari, pokina kawahi raninai, katabu ahinimi au naraonanimi ihobonai 'ao aha'i, wai abomo au katotabu ahina'u wai turaonana'u ihobonai 'ao aha'i. Au ao'u niaro'ari taba neiakia heremiai a'i matabu ahinakia paunai, baiara mai wamuru, opuere mai ani ki'a, 'abi ki'a mai uahiuahi, apa

mai baripuripu. <sup>21</sup> Au hanona ao'u niaro'ari, pokina kawahi mue raninai e'u Tirama kehore keba-haumaeanu'u wairamiai, bo'okia 'uainai tebabai ki'a hoahoa 'opukiai, ekia nabau ki'ai mai ekia maha poreporeai a'i teraona kabe haukia paukiai kahai.

## 13

*Paulo Ehina benakia A'ikakauma Aonai Katemiaho.*

<sup>1</sup> Neiana hanona rani ibaihauna au kawahi heremi. Puka robenai tererena 'abana, "Beho ha hanona maha iha\* maearimakia rua 'ao aihau ekia 'abiai kahabatohana." <sup>2</sup> Au e'u bakibaki ibaruana heremiai aonai 'uainai tobeho haumi abaraonanimi. 'A bariu atau'ai namiaho aonai harina maikoina haumi nabaraona muenimi. Au kawahi mue heremi hanona beho haumi ikoimiai puma katoa'ina. <sup>3</sup> Wai tonuatae katobatohana Keriso hana au pina'uai ni'abi. Weiana to'iohina Keriso hanona ena aka wai heremiai a'i ni'abe'abe, ia ena hiabu heremiai hanona nitabura. <sup>4</sup> 'Abi tohana Keriso hanona 'abe'abe paunai matiu ibiri ropo 'ubinai teahu 'arina, iamo bariu nimaui nemiaho Tirama ena hiabuai. 'Abi tohana Keriso ena mauri aonai ai abomo ta'abe'abe, ia emai baihatia'a heremiai hauna aonai Tirama ena hiabuai Keriso ena mauri aonai katamiaho katabarainimi.

<sup>5</sup> Kipomi emi mauri tomoiha harainakia, abomo kipomi tomo'iohi harainimi wai hanona a'ikakauma aonai tomiaho 'ao aha'i. Wai to'iohina Keriso Iesu hanona emi mauri aonai nemiaho. Aha'i raninai wai hanona

---

\* **13:1:** (1) mahakiai teihana haukia

a'i tua'ikakaumai tohana. <sup>6</sup> Au nanuatae wai kato'iohina ai hanona Keriso ena iuhubeau haumai tohamai. <sup>7</sup> Ai Tirama herenai tabahuba'ari wai beho ha a'i katobabaina paunai. Ai Keriso ena iuhubeau haumai 'ao iuhubeau haumai aha'i re'a weiana hauna aomi a'i kebaro'arina, ia emai nuatae apa'uana hanona wai aka berokia katobabai. <sup>8</sup> Ai hanona 'abi tohana ia'iki'ana akana ha a'i katababaina, ia ibaraina akana mo katababaina. <sup>9</sup> Ai ta'abe'abe iamo wai tutabura hanona aomai ninamo. Ba ai tabahuba'ari wai katobero 'aunimi. <sup>10</sup> Weiana buonai atau'ai namiaho aonai 'abi neiakia narerenakia tiwahi heremi, weiana kawahi aonai Tirama hiabu ebena'u haunai a'i mahinabe pahihinimi. Hiabu neiana hauna emi a'ikakauma kebapa'uana ia a'i kea'i ki'ana.

*'Abi Orena.*

<sup>11</sup> 'Abi orenai, uaho'aba'u e, bariu hanona ikoimiai haparua. Katoaka tabura emi a'ikakaumai katobero 'aunimi. E'u noinoi 'abikia katoa'i taeanakia, ha ha aomi katehamomo abomo baibuai katomiaho. Ba raona'au mai baibua Tiramana hanona heremiai kemiaho.

<sup>12</sup> Tirama ena banamoai ha ha katobanamonimi.

<sup>13</sup> Tirama ena robe maearimakia ikoikiai ekia banamo 'abikia teuhunakia heremiai.

**'Abi'uai Apa'uana Mahamahana**  
**The New Testament in the Waima Language of Papua**  
**New Guinea**  
**Nupela Testamen long tokples Waima long Niugini**

Copyright © 2002 Wycliffe Bible Translators, Inc.

Language: Waima

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

---

PDF generated using Haiola and XeLaTeX on 11 Nov 2022 from source files dated 22 Nov 2019

cec16783-6218-5812-9255-85478fb5e61c